

Bosna i Hercegovina
Federacija Bosne i Hercegovine
Hercegovačko-neretvanski kanton
SKUPŠTINA
Broj: 02-01-IX-115/20
Mostar, 06.10.2020. godine

IZVOD IZ ZAPISNIKA
sa devete (IX.) redovne sjednice Skupštine
Hercegovačko-neretvanskog kantona

Sjednica je održana dana 06.10.2020. godine u sali Gradske vijećnice u Mostaru sa početkom rada u 11:00 sati.

Sjednicu je otvorio Šerif Špago, predsjedavajući Skupštine Hercegovačko-neretvanskog kantona.

Sekretar Skupštine, Željka Čule, obavila je prozivku.

Prisutni: Marija Bešker, Nevenko Herceg, Stana Burić, Selma Drljević, Elvedin Grcić, Mejrima Hasić, Julineta Jurić, Tomislav Martinović, Irma Memidžan, Ivan Odak, Andrea Pehar, Milica Pehar, Đuro Prkačin, Iva Raguž, Slaven Raguž, Amir Šelo, Šerif Špago, Aner Žuljević, Damir Džeba, Alisa Hajdarević, Marija Bošković, Kenan Memić, Slavko Bilić, Vera Konjevod, Ismet Lulić i Vesna Saradžić.

Odsutni: Zora Dujmović, Edis Džino, Ajdin Teleteović i Nermin Vrtić.

Konstatovano je da je na sjednici prisutno **26** poslanika, te da postoji kvorum za rad i punovažno odlučivanje.

Prisutni po pozivu: predstavnici Vlade, predstavnici međunarodnih organizacija i predstavnici sredstava javnog informisanja.

Sjednica je javna, snimana je i snimci su sastavni dio ovog Izvoda iz zapisnika.

Otvorena je rasprava po prijedlogu dnevnoga reda.

U raspravi nije nitko učestvovao.

Usljedilo je glasanje za predloženi dnevni red devete redovne sjednice Skupštine.

Nakon glasanja konstatovano je da je jednoglasno utvrđen dnevni red devete redovne sjednice Skupštine HNK.

Prijedlog Dnevnog reda:

- 1. Poslanička pitanja;**
- 2. Izvještaj o radu Tužilaštva HNK za 2019. godinu;**
- 3. Izvještaj o radu Kantonalnog suda u Mostaru za 2019. godinu;**
- 4. Izvještaj o izvršenju sankcija u HNK iz člana 1. Zakona o izvršenju sankcija u HNK za 2019. godinu;**
- 5. Informacija o usvajanju Akcionog plana aktivnosti potrebnih za izvršenje generalnih mjera naloženih Presudom Evropskog suda za ljudska prava u predmetu Balić i drugi protiv BiH, AP BR 44080/16 i ostalih presuda prema HNK i vremenski okvir za njihovu realizaciju;**
- 6. Izvještaj o radu Javnog pravobranilaštva HNK za period od 1.1.2019. do 31.12.2019. godine;**

7. Izvještaj o realizaciji Zbirnog plana za 2019. godinu svih nosioca Programa razvoja male privrede HNK 2016.-2020. godina i Strategija razvoja malog i srednjeg poduzetništva u HNK 2012.-2020.godina;

8. Informacija o realizaciji potpisanih ugovora o koncesijama iz oblasti vodoprivrede zaključno sa 31.12.2019.

AD 1. Poslanička pitanja

Slaven Raguž:

Dobar dan. Sve vas najsrdanije pozdravljam. Ja imam jednu zastupničku inicijativu i jedno zastupničko pitanje. Zastupnička inicijativa je potpora oboljelima od ulceroznog kolitisa i kronove bolesti. Grupa građana oboljelih od ulceroznog kolitisa i kronove bolesti obratila se u više navrata s dopisom Ministarstvu zdravstva i Zavodu za zdravstveno osiguranje HNŽ-a sa zahtjevima koje ću pročitati, na što nisu dobili nikakav valjan odgovor niti zašto im se odbijaju zahtjevi niti zašto uopće ne dolaze, nisu u mogućnosti sjesti ni sa predstavnicima Ministarstva niti predstavnicima Zavoda za zdravstveno osiguranje, pa su se obratili meni kao zastupniku da iznesem kao zastupničku inicijativu sljedeće zahtjeve.

Pod jedan definiranje i odobravanje besplatnih zdravstvenih usluga iz domene bolesti ulceroznog kolitisa i kronove bolesti.

Dodavanje na esencijalnu listu lijekova imunosupresive, mesazalin, antiupalne i biološke lijekove, koji su u Europskoj Uniji besplatni, kao i enteralne pripravke ishrane, što su jedina ishrana pojedinim oboljelima od kronove bolesti.

Refundacija usluga i troškova liječenja koje ne može pokriti obvezno zdravstveno osiguranje. Odobrenje biološke terapije kod svih oboljelih, kod kojih oralni medikamenti nisu dali pozitivan rezultat bez obzira na težinu i fazu bolesti.

Izmjene i dopune odluke o listi lijekova obveznog zdravstvenog osiguranja na razini F BiH, te mogućnost uvođenja skraćenog radnog vremena za oboljele, bar u fazi pogoršanja bolesti.

Da sad ne duljim, ja sam ovdje priložio dopis koji su oni prosljedili meni, ali samo ću podsjetiti na statističke podatke, aktualne, trenutne službene podatke Zavoda za javno zdravstvo, gdje su smrtno posljedice od bolesti probavnog trakta među prvima, ako ne i najveće po brojnosti, čak veće i od ove korone i posljedica oboljelih od korona virusa. Prema tome, prosljeđujem ovaj zahtjev grupe oboljelih od ovih bolesti i da se uzme na razmatranje i da se omogući ovim ljudima, ako ništa da se sastanu sa predstavnicima Ministarstva i predstavnicima Zavoda za zdravstveno osiguranje.

Drugo je, zastupničko pitanje gospodinu Željku Laketiću, ministru gospodarstva HNŽ-a. Tko su i na osnovu kojih mjerljivih kriterija definirani Zakonom o proračunima i Zakonom o sustavu državne pomoći izabrani korisnici sredstava Ministarstva gospodarstva sa pozicije subvencije privatnim poduzećima i poduzetnicima, a na osnovu javnog poziva objavljenog za 2019. godinu? Ako se sjećate, ja sam iste podatke tražio za 2018. godinu, nisam ih dobio, obveza je poštivanje Zakona o proračunima, koji je jasno definirao da se sve subvencije i financijska davanja iz proračuna moraju mjerljivim pokazateljima pokazati zašto se nekom dao određeni iznos, zašto se nekom drugom uskratio taj određeni iznos, jednako kao što, budući da nisam dobio podatke za 2018. nadam se da će se ispoštovati ovo za 2019. godinu i ukoliko i ovaj put ne dobijem valjan odgovor ja ću inzistirati da se ovo pitanje iznese na dnevnom redu neke od budućih sjednica skupštine, naravno kad istekne poslovnički period na osnovu kojeg iz ministarstva mi trebaju dostaviti odgovor. Zahvaljujem.

Ivan Odak:

Sve vas skupa pozdravljam. Imao sam pripremajući ovu točku, mislio sam da dam prijedlog za izmjenu dnevnog reda i skidanje točke 2 sa dnevnog reda, ali glasovanjem možda ne bi to prošlo povoljno kako sam naumio, pa onda vjerojatno ne bi imao priliku da izložim ovdje što sam mislio. Ali zato sada upućujem inicijativu za tematsku sjednicu skupštine, tema bi bila Šumsko gospodarsko društvo Šume Hercegovačko-neretvanske županije. Kako vam je poznato krajem prošle godine postavio sam zastupničko pitanje u svezi postupanja tijela uprave i županijskog tužiteljstva u predmetima vezanim za mjere zabrane korištenja državnih šuma na području HNŽ-a, gdje je na istoj sjednici donesen zaključak da se održi tematska točka dnevnog reda skupštine ukoliko se u roku od mjesec dana ne da odgovor na postavljena pitanja. U međuvremenu sam dobio nepotpune i nejasne odgovore od strane MUP-a HNŽ-a i Ministarstva poljoprivrede, šumarstva i vodoprivrede HNŽ-a, dok od Tužiteljstva do danas nisam dobio nikakav odgovor. Shodno naprijed navedenom tražim da se što hitnije održi, pod jedan tematska sjednica Skupštine HNK-a o stanju u oblasti šumarstva na području HNK-a, te da se do održavanja tematske sjednice skupštine zaduže skupštinska povjerenstva za zakonodavno-pravna pitanja, da kod nadležnih sudova zatraže aktualni izvod iz sudskog registra za poduzeća, pod 1 Šume Herceg-Bosne d.o.o. Mostar, pod 2 Javno poduzeće ŠGD Šume Hercegovačko-neretvanske d.o.o. Mostar, pod 3 Šumarstvo Srednje-Neretvansko”d.d. Mostar, pod 4 Šumarstvo Prenj d.d. Konjic i pod 5 Šumarstvo Ljuta d.d. Ilidža, a sve s ciljem utvrđivanja postojanja javnih ovlasti u pogledu korištenja šuma i šumskog zemljišta na području HNŽ-a i drugih prava u pogledu korištenja šuma, te da se isti očituju u Skupštini HNŽ-a na tematskoj sjednici. Pored navedenog od ovog istog povjerenstva očekujem da utvrde što su isti poduzimali u svezi izvršenja sudskih odluka za koje sam postavio zastupničko pitanje, odnosno o zaštiti javnog interesa HNŽ-a i javnih ovlasti datih javnom poduzeću Šumsko gospodarskom društvu Šume Hercegovačko-neretvanske, Ministarstvo unutrašnjih poslova, Tužiteljstvo HNŽ-a, Županijsko pravobraniteljstvo, Ministarstvo poljoprivrede, šumarstva i vodoprivrede HNŽ-a i Javno poduzeće ŠGD Šume Hercegovačko-neretvanske. Da inspekcija izvrši kontrolu javnih ovlasti kod svih poduzeća, iz članka 18.j stavak 3 i stavak 4, Službene novine F BiH 73/14, te o poduzetim aktivnostima izvijesti Vladu i Skupštinu HNŽ-a. Za sjednicu također zatražiti od nadležnih sudova, zemljišno-knjižnih ureda očitovanje dali su šume i šumska zemljišta upisana kao državno vlasništvo ili su upisana na nekog drugog i temeljem kojih zakona je to urađeno.

Pod 3, zatražiti izjašnjenje Vlade F BiH zbog nepoštivanja javnih ovlasti iz oblasti šumarstva, odnosno nepoštivanja prava javnog poduzeća ŠGD Šume Hercegovačko-neretvanske jer su istom odlukom Skupštine HNŽ-a povjerene mu javne ovlasti u pogledu korištenja ovog prirodnog bogatstva.

Pod 4, zatražiti izjašnjenje Vlade F BiH o neizvršenju presuda Kantonalnog suda Sarajevo koje sam naveo u zastupničkom pitanju.

Obrazloženje. Potrebu za hitnom i vanrednom sjednicom tražim iz razloga što se ne poštuje odluka Skupštine HNŽ-a koja je svojom odlukom o osnivanju šumsko privrednog društva istom dala javne ovlasti za korištenje šuma, dok šume i dalje koriste poduzeća koja za to nemaju nikakve ovlasti, a imaju izrečene mjere zabrane, time stiču višemilijunsku imovinsku korist bez osnova i nanose štetu korisniku koga je odredila Skupština HNŽ-a.

U vezi ovog naprijed navedenog, mislio sam da skinemo točku dnevnog reda, izvješće o tužiteljstvu, ali poslušat ćemo i to pa ćemo i tu imati svoj dodatak. A obrazloženje, uputio sam zastupničko pitanje u svezi sa postupanjem po sudskim zabranama, a dobio sam odgovore po presudama Ustavnog suda u svezi Zakona o šumama i Uredbe o šumama i prestanku njihove primjene, što mi nije novost s obzirom da sam svojevremeno bio član nadzodnog odbora u javnom poduzeću Šumsko gospodarsko društvo Šume Hercegovačko-neretvanske, te sam široko više upoznat sa ovom problematikom od strane uprave društva te znam prava i obaveze šumsko gospodarskog društva o osnivanju, koje su na temelju ustavnih nadležnosti u skladu

člana 3, podjela nadležnosti između federalne i kantonalne vlasti, članak 2 i korištenju prirodnih bogatstava. Članak 2 Zakona o javnim poduzećima, javno poduzeće u smislu ovog zakona jeste poduzeće, pravno lice upisano u sudski registar kao gospodarsko društvo, odnosno javno poduzeće definirano kao takvo posebnim propisom, koje obavlja djelatnost od javnog društvenog interesa, energetika, komunalne djelatnosti, upravljanje javnim dobrima i druge djelatnosti od javnog društvenog interesa. Članak 2, stavak 2, djelatnosti od javnog društvenog interesa utvrđuju općine, kanton i F BiH, svatko u okviru svojih nadležnosti. Zakon o stvarnim pravima F BiH, članak 7, stavak 3, općim i javnim dobrima vodi brigu i njima upravlja i za to odgovara određeni subjekt javne uprave, F BiH, kanton, grad, općina. Isto se određuje posebnim zakonom članak 8, dobra od općeg interesa, članak 8, stavak 1, stvari koje su posebnim zakonom određene da su dobra od općeg interesa uživaju posebnu zaštitu. Članak 8, stavak 3, vlasnici i nosioci drugih stvarnih prava na dobrima od općeg interesa dužni su vršiti svoja prava u skladu i načinom upotrebe i korištenja propisanih posebnim zakonom. Članak 22, posebno o vlasništvu osoba javnog prava, članak 22, stavak 1, pravne osobe javnog prava općina, grad, kanton, entitet, država, javno poduzeće, ustanove i drugi koji su nosioci prava vlasništva imaju kao vlasnici u pravnim odnosima jednak položaj kao i drugi vlasnici. Članak 22, stavak 2, nekretninama u vlasništvu javnog prava raspolaže, upravlja i koristi ih tijelo koje je za to nadležno na osnovu zakona.

U svezi svega naprijed navedenog smatram da se u toj oblasti od strane nadležnih ne postupa u skladu s ustavom i odlukama ove skupštine, te da od istih ću zatražiti na potpunom izvješću što su poduzimali u proteklom periodu da se zaštiti ustavna nadležnost HNŽ-a, odnosno kantona, i njene odluke. Dobro znamo u F BiH od 10 županija ili kantona u 9 imamo zakon o šumama, samo u desetom kantonu Hercegovačko-neretvanskoj županiji već 11.-tu godinu nemamo zakona o šumama. Ne znam kome je to u interesu, komu je u interesu organizirani kriminal i volio bih ovdje u skupštini da se kolege i kolegice zastupnici izjasne o ovoj inicijativi, da vidimo komu je stalo do lopovluka, komu je stalo da se ovo istjera na čistac, dali to HDZ 1990. prikriva nešto, dali SDA prikriva, dali HDZ BiH, SBB-e ili ovi ostali politički subjekti!? Toliko. Hvala.

Aner Žuljević:

Zahvaljujem predsjedniče. Pošto se prvi put javljam, da pozdravim sve prisutne. Ja imam jedno poslovničko praktično pitanje. Kad mi kao zastupnici podnesemo izmjene zakonskog prijedloga u proceduru na koji način možemo doći do informacija dali je to uopšte proslijeđeno Vladi na razmatranje u skladu sa poslovníkom i dali eventualno Vlada je nekakav akt razmatrala i poslala svoje mišljenje kad je to u pitanju. To govorim zato što sam ljetos predložio zakon o izmjenama i dopunama zakona o koncesijama, doslovno nisam dobio nikakvu povratnu informaciju kada je u pitanju taj zakon, ali nije prvi put da mi na neki način same sebe omalovažavamo. One odredbe u poslovniku koje nam daju mehanizam da imamo neku praktičnu političku snagu da mijenjamo stvari zbog toga što smo valjda izabrani da možemo i pomagati Vladi i svima nama zajedno, završimo u procedurama da niti se izjašnjavamo se o inicijativama niti dobijamo adekvatne odgovore na poslanička pitanja, iako moram priznat da u ovom mandatu najveći dio postavljenih pitanja od strane ministara što se mene lično tiče bio odgovoreno i ja im se ovim putem naravno i zahvaljujem. Eto volio bi samo da dobijem odgovor na koji način mogu dobiti dodatne informacije pošto smatram da se radi o zakonu koji bi trebao da spriječi odgovarajuće najave tužbi koje bi se mogle desiti prema ovom kantonu zbog određenih stvari koje su potpuno pogrešno pravno, legislativno definisane u tom zakonu o izmjenama i dopunama zakona o koncesijama. Naravno nije to moja pamet, nikad se ne krijem da kažem da sam ja nešto revolucionarno osmislio, radi se o ekspertima, struci, koja me argumentovano ubjedila da to treba podnijeti na taj način.

Druga stvar, možete tumačiti ili kao pitanje ili kao inicijativu, i volio bi stvarno da ovo na neki način adekvatno u narednom periodu i riješimo. Kontaktiran sam od strane određenih medicinskih radnika sa informacijom da osoba koja ode u izolaciju dobija 100% plate, a osoba koja je bolesna od Covida medicinski radnik faktički dobije 80% plate u skladu sa onim što je definisano bolovanjem. Meni se radi o potpuno nelogičnim postavkama bez obzira što će mene neko sad ovdje pokušat da ubjedi kako se radi o odredbama pravilnika, nisu to sveta pisma i radi se o činjenici da mi ulazimo u prostor vjerovatno dinamične situacije kada je u pitanju ova pandemija i zdravstveni profesionalci su neko ko je najviše izložen, zajedno naravno sa svim onim javnim službama koje imaju direktan i masovan kontakt sa potencijalno oboljelim. Zato bi volio da pokrenem inicijativu prema nadležnim institucijama u našem kantonu da razmotre ovaj problem i utvrde određeno prijelazno rješenje, da ne pravimo diskriminaciju između zdravstvenih radnika koji su u izolaciji i koji su bolesni u razlici u plati, a volio bi da ova skupština usvoji jedinstveni zaključak jer sam dobio informaciju da se profesionalne bolesti uvrštavaju na federalnom nivou. I da mi kao skupština danas zatražimo od federalne Vlade, odnosno nadležnih institucija u F BiH, da ovu bolest Covida tretira kao profesionalno oboljenje, u skladu sa onim pravilnicima koji su to tretirali, i da na taj način jedinstveno riješimo ovaj problem kada su u pitanju zdravstveni radnici. Znači volio bi inicijativu prema našim kantonalnim, da u smislu bolovanja i načina isplate prema zdravstvenim radnicima, odnosno menadžmentima institucija, utvrdimo neko unificirano pravilo da nema diskriminacije dali je neko u izolaciji ili je obolio u toj čitavoj priči i da prema Federaciji izađemo sa inicijativom da se Covid-19 tretira kao profesionalno oboljenje za zdravstvene radnike. Zahvaljujem.

Šerif Špago:

Evo samo odgovor gospodinu Žuljeviću. S obzirom da ovaj dio vezano za upućivanje zakona i inicijativa je u nadležnosti predsjedavajućeg skupštine, naš poslovnik predviđa dvije varijante, jedna je inicijativa za donošenje zakona, kad neko uputi u proceduru inicijativu predsjedavajući je dostavlja vladi da da mišljenje i zakonodavno-pravnoj komisiji da da mišljenje. Nakon pribavljanja tih mišljenja skupština zaključkom određuje dali se prihvata inicijativa ili ne prihvata i zadužuje naravno ako se prihvati inicijativa ko će vršiti izradu zakona. Druga varijanta, poslanici po poslovniku, klubovi, klubovi poslanika, klubovi naroda, imaju mogućnost direktno uputit u proceduru zakon, odnosno nacrt, prijedlog ili već u kojoj fazi. Po našem poslovniku ako prijedlog zakona, odnosno nacrt zakona nije predložila vlada također ide na mišljenje na vladu. Nažalost imamo nedostataka u poslovniku, nisu određeni rokovi do kad se trebaju dat ta mišljenja. Evo ja preuzimam obavezu ubuduće kad ove stvari, a i ove što su dosad bile, kad pošaljem znači vaš zakon koji je u proceduri prema vladi da na znanje pošaljem i zastupnicima kad je iz skupštine ili od predsjedavajućeg otišao na vladu prijedlog, odnosno nacrt zakona. Jeste li zadovoljni gospodine Žuljeviću? I ovi koji su u proteklom periodu u ovom mandatu slali te prijedloge, odnosno inicijative, dobit će u narednom periodu znači akte naše kad su proslijeđeni prema vladi njihovi prijedlozi, odnosno inicijative. Gospodin Lulić, izvolite.

Ismet Lulić:

Evo pozdravljam i ja sve prisutne. Ja imam danas dva zastupnička pitanja i to oba su jeli prema Vladi HNK-a i Ministarstvu obrazovanja, nauke, kulture i sporta. Prvo zastupničko pitanje. Ministarstvo obrazovanja, nauke, kulture i sporta HNK-a je u dva navrata raspisivalo javne pozive za dodjelu sredstava iz oblasti kulture i sporta, i to 237.600 KM 22.05.2019. godine za sport i 22.000 KM za kulturu, kao i 19.12.2019. godine 418.000 KM za sport i 689.000 KM za kulturu. Ukupno je kroz ova dva poziva u prošloj godini planirano 656.000 KM za sport i 918.000 KM za kulturu. Za ove javne pozive rezultati nikad nisu objavljeni putem

zvanične web stranice ministarstva sa kojih je upućen poziv za dodjelu ovih sredstava niti su sve organizacije koje su aplicirale na javni poziv dobile obavještenje o rezultatima istih. Postavljam pitanje dali su navedena sredstva dodjeljena i javno objavljena? Tražimo konačnu rang listu, kao i rezultate bodovanja svih aplikanata, te iznose koji su dodijeljeni aplikantima. Ipak su ovo jeli ozbiljna sredstva da mi kao zastupnici u skupštini kao i cijela javnost nemamo informaciju o trošenju tih novčanih sredstava.

I moje drugo zastupničko pitanje, isto tako prema Ministarstvu obrazovanja, nauke, kulture i sporta. S obzirom da je ministar spomenutog ministarstva u Vladi HNK-a još prije dvije godine najavio donošenje zakona o predškolskom obrazovanju u HNK-a postavljam pitanje u kojoj je fazi najavljeni zakon i kad ga možemo očekivati u skupštinskoj proceduri? Toliko. Hvala.

Elvedin Grcić:

Dobar dan svima. Pozdravljam kolegice i kolege zastupnike, predstavnike medija i prisutne goste. Moje zastupničko pitanje odnosilo bi se na jedan od zaključaka koje je ova skupština usvojila u prethodnom periodu, a po pitanju sačinjavanja izvršenja analize stanja sigurnosti na putevima i našem kantonu. Naime, zaključak ove skupštine je bio da se izvrši ova analiza, da se sačini program postavljanja stacionarnih stanica za mjerenje brzine kretanja, a sve u cilju prevencije i smanjenja broja saobraćajnih nezgoda koje se dešavaju na području našeg kantona. Pitanje Vladi, odnosno Ministarstvu unutrašnjih poslova HNK-a, dali je izvršena ova analiza, dali je znači sačinjen program, ako jeste kada će doći do realizacije ovog programa? Hvala.

Stana Burić:

Kolege sve vas lijepo pozdravljam. Pokrenut ću jednu inicijativu za donošenje zakona o zaštiti osoba sa invaliditetom, a slušajući maloprije kolegu Raguža mislim ono da sam 100 posto u pravu. Mi smo davno potpisali, BiH je davno potpisala konvenciju o zaštiti prava osoba sa invaliditetom, to je bilo negdje 2010. godine, i ta konvencija ne poznaje način stjecanja invaliditeta, što ne znači da treba zadirat u prava vojnih invalida, oni se mogu riješit, njihove naknade i njihova prava se mogu rješavati i na drugi način i drugim zakonom, ali mislim kad je neko stekao invaliditet da je to invalidnost i da tu invalidnost treba poštovati i rješavati i pomoći tim ljudima, posebno imamo osobe sa poteškoćama u razvoju. Znači te osobe niko ne tretira, baš niko, jedino udruge koje se zauzmu i njihovi roditelji. Treba ih uvest u prava, a naše je da razmislimo kako namaknut sredstva i pomoć tim ljudima.

Znači konvencija ne poznaje način stjecanja invaliditeta, izjednačiti sva prava i moj je zahtjev da se više pokrene i donese zakon o zaštiti osoba sa invaliditetom na prostoru ove županije.

Andrea Pehar:

Lijep pozdrav svima. Ja imam danas jedno zastupničko pitanje, ono je upućeno Ministarstvu prosvjete, znanosti, kulture i športa HNŽ-a. U studenom prošle godine Međunarodna osnovna škola u Mostaru obratila se resornom ministarstvu sa zahtjevom za izmjenom i dopunom zakona o osnovnom obrazovanju, kojim bi se omogućilo izvođenje nastave na stranom, odnosno engleskom jeziku. U našim susjednim županijama, kao i u privatnim srednjim školama isto je dozvoljeno, te se nastava odvija u modificiranim programima na stranom jeziku, u skladu sa odobrenim nastavnim planom i programom. Cijenim da bi se uvođenjem spomenutog unaprijedio obrazovni program u našoj županiji jer bi se tim istim učenicima od najranijih razreda osnovne škole omogućilo podučavanje stranih jezika,

djeci iseljenika omogućili jednostavniji povratak, potencijalnim stranim investitorima i međunarodnim dužnosnicima omogućili da i njihova djeca za vrijeme boravka u BiH mogu neometano pohađati nastavu. Za ove roditelje nastava na engleskom jeziku predstavlja jedan od ključnih kriterija za odabir škole. Tražim od ministarstva da mi u pisanoj formi odgovori zašto se ignorira zahtjev Međunarodne osnovne škole i zbog čega se odugovlači s pristupom izmjenama i dopunama zakona o osnovnom obrazovanju? Zahvaljujem.

Slavko Bilić:

Dobar dan. Pozdravljam sve nazočne. Predmet je znači zastupničko pitanje ministru pravosuđa, uprave i lokalne samouprave HNŽ-a gospodinu Suadu Baliću. Što se poduzelo glede otvaranja odjela općinskog suda u Općini Prozor-Rama? Naime, postoje određeni uvjeti za njegov rad glede tehničkih uvjeta i prostora koji već postoje kako bi se ovo pitanje riješilo. Prema svim parametrima znači koji su bili preduvjet za formiranje odjela općinskog suda na području naše općine, Općine Prozor-Rama znači, ako se gleda i promatra broj stanovnika, znači udaljenost, da je Općina Prozor-Rama udaljena od Konjica 65 kilometara, a njeni rubni dijelovi 20 kilometara još duže ili od Mostara čak 100 kilometara, znači postoje uvjeti da se osnuje taj odjeljak suda iz Konjica, a preduvjet je bio i zakonski je to regulirano još 2013. godine kada je Zakon o sudovima F BiH donio odluku kojom se zaključuje da Općinski sud u Konjicu ima odjeljenje izvan sjedišta, odnosno da ima svoje odjeljenje u Općini Prozor-Rama, te da će ovo odjeljenje općinskog suda započeti kada se ispune neophodni uvjeti. Dakle, budući da su ispunjeni ovi uvjeti za rad općinskog suda u Općini Prozor-Rama glede i tehničkih uvjeta, već postoje određeni prostori gore, i malo treba da se oni dorade i uredi. Također interesira me ministre što ste poduzeli po ovom pitanju kako bi konačno ovo odjeljenje započelo sa radom? Zahvaljujem.

Suad Balić, ministar pravosuđa, uprave i lokalne samouprave HNK:

Dobar dan svima. Lijep pozdrav. Pa evo ja ću u par riječi, a mogu dostaviti i pismeno odgovor, odgovor znači što se tiče osnivanja odjela općinskog suda Konjica u Prozoru. Znači svi potrebni preduslovi što se tiče kako ste i naveli sami ovaj i prostora i opreme su obezbjeđeni, u toku je, odnosno raspisan je javni oglas za popunu tih potrebnih radnih mjesta za tri namještenika koji će raditi u područnom odjeljenju gore i mi čekamo završetak te procedure, da bi evo i zvanično jeli krenulo odjeljenje suda u Prozoru sa radom. Dok se ne završi to moramo obezbjeđiti radnu snagu koja će raditi tu, ostale sve predispozicije su završene, ali to ćemo vam evo i pismeno dostavit. Zahvaljujem.

Damir Džeba:

Poštovani predsjedatelju, predsjedniče Vlade, ministri. Imam 2 zastupnička pitanja. Prvo je vezano za Ministarstvo prosvjete, znanosti, kulture i športa, naravno vezano je za naše ljude zaposlene u obrazovnom sustavu, jučer smo mi imali Svjetski dan učitelja, evo Vlada na čelu sa premijerom je čestitala i ohrabrila naše djelatnike, sve osobe uključene u rad osnovnih i srednjih škola, evo ne bih tu izostavio vrtiče, i pozvala ih i pozdravila ih, ali da mi sa svoje strane napravimo sve što je u mogućnosti da im olakšamo stvari u ovom aktualnom vremenu, kako s početkom nastave u školama, tako i u nastavku njihovog djelovanja rada u ovim uvjetima. Pa imam za ministra Hadžovića pitanje, evo njega nema ovdje, moje zastupničko pitanje glasi, znači i volio bih da se u pismenom obliku dostavi, ministre imate li podatak o broju pozitivnih na test COVID-19 nastavnika, učitelja, učenika i uposlenih u osnovnim i srednjim školama, koliko imamo skupina, tj. odjela u samoizolaciji? Te molim da se u pripremi ove informacije pismeno koriste aktualni podaci, odnosno aktualno stanje na dan kreiranja

informacije. Obrazloženje: zastupnici, odnosno skupština i javnost moraju imati ove podatke kako bi mogli donijeti pravovaljane odluke, pravovaljane stavove, pravovremeno i blagotvorno djelovati na aktualno stanje te tako pomogli našim učiteljima, nastavnicima, evo ravnateljima osnovnih i srednjih škola, da se izbore sa ovom pandemijom Corona virusa jer još ne znamo šta nas čeka u nastavku godine kroz jesen. Stoga je ovo pitanje vrlo bitno da imamo pravodobne i kvalitetne informacije.

Drugo pitanje je vezano također za Vladu HNŽ-a, točnije za Ministarstvo financija, odnosno za gosp. ministra Faladžića. Poštovani ministre jeste li i ako niste, hoćete li u rebalansu proračuna za 2020. godinu osigurati financijska sredstva za provođenje strategije HNŽ-a za borbu protiv korupcije? Obrazloženje: Vlada HNŽ-a je donijela odluku o usvajanju strategije HNŽ-a za borbu protiv korupcije 2016.-2020. godina i akcionog plana HNŽ-a za provođenje strategije HNŽ-a za borbu protiv korupcije. Odluka je objavljena 13.12.2016. godine, Službene novine broj 10, 2016. godina. Sukladno navedenoj odluci Ministarstvo financija mora planirati sredstva za provedbu strategije i pratećih akcijskih planova. U nastavku obrazloženja, evo to je onaj dio Službenih novina, opći principi i načela strategije akcijskog plana HNŽ-a, mislim da je dobro ponoviti ovo, nadam se neki zastupnici znaju, neki ne znaju. „Imajući sve izraženiju društvenu svijest i opredjeljenost za uspješnu i angažiranu borbu protiv korupcije strategija i akcijski plan predviđaju provodive, jasne i konkretne ciljeve koji uvažavaju sve specifičnosti HNŽ-a. Jedna od glavnih stavki je povećanje transparentnosti pri donošenju odluka. Ukoliko proces donošenja odluka nije javan povećava se vjerovatnoća korupcije ili njezinog skrivanja. Proces donošenja odluka o HNŽ-u još uvijek nije dovoljno javan, a problemi se javljaju prilikom donošenja pravnih propisa, odsustva javnih rasprava ili nedovoljne uključenost zainteresiranih aktera, skrivenosti utjecaja na donošenje odluka, lobiranja, odsustva analiza i nepotpunih obrazloženja. Pored toga korupciji pogoduju i generalni manjak transparentnosti rada institucija i nedovoljna sloboda u pristupu informacijama. Na razini zakonodavne i izvršne vlasti nalaze se institucije koje imaju ključnu ulogu u borbi protiv korupcije u HNŽ-u, a to su Skupština HNŽ-a, znači svi mi ovdje zastupnici, Vlada HNŽ-a i institucije HNŽ-a, te javna preduzeća i ustanove. I zaključno, za implementiranje strategije akcijskog plana treba predvidjeti resurse potrebne za provođenje svake od aktivnosti institucija koje će biti zadužene za njihovu primjenu. Ovi proračunski korisnici trebaju uvrstiti i posebno iskazati sredstva koja su im potrebna radi realiziranja strategije akcijskog plana, te u obrazloženju svojih financijskih zahtjeva upozoriti na moguće posljedice ne odobravanja takvog proračuna. Ministarstvo financija, Vlada HNŽ-a i Skupština HNŽ-a trebaju poduzeti sve moguće napore na osiguranju sredstava potrebnih za tako važnu reformsku aktivnost kao što je borba protiv korupcije. Strateški cilj vezan za Ministarstvo financija jeste osiguranje financijskih sredstava za provedbu strategija i prateći akcijskih planova za borbu protiv korupcije na svim razinama u HNŽ-u.“ Ovo sam pročitao iz razloga što je ovo objavljeno od 13. prosinca 2016. godine, nama znači u prosincu ove godine završava akcioni plan borbe protiv korupcije i molio bih evo ministra da uvrsti financijsku stavku za ovu aktivnosti Vlade HNŽ-a, Skupštine i sve ono što nosi nama strategija i akcijski plana, on je napisan na nekakvih evo 50-ak stranica. Hvala lijepo na pozornosti.

Milica Pehar:

Hvala lijepa. Pozdravljam sve nazočne. Moje pitanje je upućeno Ministarstvu obrazovanja, znanosti, kulture i športa i odnosi se na onaj dio operativni koji se događa u učionicama, a sve je u svezi s pandemijom Covida 19. Kada će Ministarstvo obrazovanja, znanosti, kulture i športa uraditi evaluaciju usvojenosti nastavnih sadržaja kod učenika za školstvu 2019./2020. godinu, preciznije za vrijeme nastave na daljinu i koje će aktivnosti poduzeti kako bi se, ako povratna informacija ne bude zadovoljavajuća, nadoknadilo propušteno? Zaključno s današnjim danom nijedna inicijativa iz Ministarstva prema školama nije upućena, znamo da je situacija bila izvanredna i mislim da bi se u tom smislu trebalo nešto poduzeti kako bi se sagledalo pravo stanje stvari. Obrazloženje: obrađivati nove nastavne sadržaje samo zato da bi se ispoštovao nastavni plan i program, a ne usvojiti prethodne sadržaje dugoročno će ostaviti velike posljedice na obrazovanje učenika u budućnosti, ali i na njihovo samopouzdanje jer će im zbog nedostatka prethodnih znanja biti znatno otežano usvajanje novih. Hvala.

Julineta Jurić:

Pozdravljam sve nazočne. Zastupnička pitanja upućujem Ministarstvu prosvjete, znanosti, kulture i športa HNŽ-a. Kada će prosvjetnim djelatnicima biti vraćen status mentora i savjetnika? Obrazloženje: Vlada HNŽ-a je na sjednici održanoj 26.2.2013. godine donijela odluku o stavljanju izvan snage odluke o promoviranju nastavnika/mentora i nastavnika/savjetnika. Po kolektivnom ugovoru stoji promovirani mentori i savjetnici, a posljednje imenovanje i to privremeno je bilo 2014. godine.

Drugo pitanje, zašto se ne provodi odluka iz kolektivnog ugovora da se promoviranim mentorima umanjuje nastavna norma za 1 sat tjedno, a promoviranim savjetnicima za 2 sata tjedno u slučajevima kada imaju vježbenika ili lice na stručnom usavršavanju u cilju polaganja stručnog ispita?

Upućujem inicijativu Vladi HNŽ-a. Vlada HNŽ-a da bude supotpisnik za davanje dozvola za rad visokoškolskim ustanovama. Osnivanje visokoškolskih ustanova definirano je Zakonom o visokom obrazovanju u HNŽ, Narodne novine HNŽ broj 4/12 i to kroz poglavlje 3 osnivanje i prestanak rada visokoškolske ustanove. Postupak se odvija u 2 dijela, prvi je korak u kojem osnivač ministarstvu dostavlja elaborat o osnivanju, a mišljenje o elaboratu daje posebno ekspertno povjerenstvo koje se sastoji od 5 članova i to 3 istaknuta znanstvena djelatnika, 1 predstavnika osnivača i 1 predstavnika ministarstva. Odluku o davanju suglasnosti na elaborat donosi ministarstvo na prijedlog ekspertnog povjerenstva, članak 14 zakona. Drugi korak je definiran člankom 17 zakona, a odnosi se na ispunjenost uvjeta za početak rada i obavljanja djelatnosti visokog obrazovanja. Osnivači podnose zahtjev ministarstvu za donošenje rješenja o ispunjenosti uvjeta za početak rada visokoškolske ustanove nakon čega ministarstvo formira povjerenstvo koje utvrđuje ispunjenost uvjeta. Povjerenstvo broji 5 članova i čine ga 3 sveučilišna nastavnika, 1 predstavnik osnivača i 1 predstavnik ministarstva. Na temelju ocjene povjerenstva ministarstvo donosi rješenje. Članak 19, dozvola za rad, nakon donošenja akta o osnivanju rješenja o ispunjavanju uvjeta za početak rada i obavljanje djelatnosti visokog obrazovanja Ministarstvo izdaje dozvolu za rad licencu. Članak 20, visokoškolska ustanova sa sjedištem izvan županije, visokoškolska ustanova sa sjedištem u BiH ili u drugoj državi može organizirati studij na području županije uz suglasnost Ministarstva koje utvrđuje postoji li društvena opravdanost za organiziranje takvog studija. Suglasnost iz stavka 1 ovog članka daje Ministarstvo na temelju elaborata, a nakon utvrđivanja ispunjenosti uvjeta za početak rada visokoškolske ustanove propisane ovim zakonom. Naime, kao zastupnica u Skupštini HNŽ-a i član povjerenstva za obrazovanje, kulturu, šport i mlade održala sam sastanak s Vijećem mladih Grada Mostara kako bi se upoznala s njihovim problemima i potrebama. Na sastanku je predsjednik Unije studenata Univerziteta Džemal Bijedić u Mostaru,

Mirza Lalić naglasio kako su studenti razočarani otvaranjem nove privatne visokoškolske ustanove Union u Mostaru jer smatraju kako studenti u privatnim visokoškolskim ustanovama ne dobivaju potrebito znanje kao što je to na javnim, a s druge strane na puno lakši način stječu zvanja i dolaze do diploma. Lalić je stoga predložio da se zakonske odredbe vezano za postupak osnivanja visokoškolskih ustanova trebaju izmijeniti i to na način da Vlada HNŽ sudjeluje u donošenju odluka. Kao zastupnica u Skupštini ovom prigodom prenosim inicijativu predsjednika Unija studenata Univerziteta Džemal Bijedić u Mostaru, Mirze Lalića i čvrstog sam uvjerenja kako će te istu razmotriti i usvojiti.

Drugu inicijativu upućujem Ministarstvu zdravstva, rada i socijalne skrbi HNŽ, financiranje sonda za hranjenje šprica, za hranjenje sonda za respiraciju oboljelih od cerebralne paralize i osobama s posebnim potrebama bez ograničenja godina korisnika. ZZO HNŽ znači odlukom koju sam ovdje navela, da je sada ne čitam, o visini sudjelovanja ZZO HNŽ/K u troškovima nabave ortopedskih i drugih pomagala koja se mogu propisivati u okviru obveznog zdravstvenog osiguranja. Članak 1, ovom odlukom određuje se visina sudjelovanja ZZO HNŽ/K u troškovima nabavke ortopedskih i drugih pomagala koja se mogu propisivati u okviru obveznog zdravstvenog osiguranja osiguranim osobama u HNŽ/K na način kako slijedi: stavak 21 8, sanitarne i druge sprave, sonde za hranjenje, šprice za hranjenje, sonde za respiraciju, Zavod odobrava djeci do 15 godina oboljeloj od cerebralne paralize i djeci s posebnim potrebama. Znajući da cerebralna paraliza ne prestaje s 15 godina, kao i djeca koja imaju posebne potrebe, iste te potrebe imaju i dalje, pa molim ZZO da sonde za hranjenje, šprice za hranjenje i sonde za respiraciju ne ograničavaju godinama korisnika, nego oboljelim od cerebralne paralize i osobama s posebnim potrebama financiraju dok traje potreba za istim.

I treću inicijativu upućujem Ministarstvu prosvjete, znanosti, kulture i športa HNŽ, izjednačenje koeficijenta pedagoga s koeficijentom profesora. Već dugi niz godina pedagozima uposlenim u srednjim školama na području HNŽ nanosi se velika nepravda jer su u odnosu na kolege profesore neutemeljeno zakinuti u plaćama. Naime, još prije nekoliko godina u Ministarstvu obrazovanja, znanosti, kulture i športa HNŽ usvojena je odluka prema kojoj je stručnim suradnicima srednjih škola, pedagozima, određen koeficijent od 2,16 a profesorima je određen koeficijent od 2,22 bez obzira na istu stručnu spremu. Svjesni učinjene nepravde pedagozi su već slali zamolbu od 16. siječnja 2014. godine Ministarstvo prosvjete, znanosti, kulture i športa HNŽ-a. Dobiveni odgovor je znači da se obrate sindikatu i riješe to pitanje. Posao školskih pedagoga je jako kompleksan, sveobuhvatan, jednako odgovoran kao i poslovi profesora, te smatramo kako se pedagozima čini velika nepravda. Školski pedagozi imaju kompetencije za većinu aktivnosti u doprinosu uspješnosti škole. Pružaju nesebičan doprinos napornim i ustrajnim radom. Pedagog da bi doprinio cjelovitom razvoju i osobnosti djeteta stalno ima u vidu prošlost, sadašnjost i budućnost jer bez te vertikale dijete kao pojedinac ne bi mogao razvijati svoj identitet. Pedagoški argument je da promišljamo da u današnjem djetetu vidimo osobu kakva jest i šta će u budućnosti postati. U srednjim školama HNŽ-a ima 28 pedagoga, razlika u plaći je samo 30 KM, što znači na mjesečnom nivou ne bi bilo ni 900 KM. Vjerujem da Ministarstvu prosvjete, znanosti, kulture i športa ovo nije veliki izdatak za budžet, stoga vas molim da upotrijebite svoje ovlasti kako bi se ispravili ovu nepravdu jer ovdje nije riječ o novcu nego o diskriminaciji.

Alisa Hajdarović:

Pozdravljam kolegice i kolege zastupnike, članove Vlade i građanstvo koje nas prati putem linka Bljesak. Moja inicijativa se djelomično poklapa sa inicijativom kolege Slavena Raguža, istu inicijativu sam podnijela na prošloj sjednici skupštine samo je bila upućena prema ZZO, koje mi je vrlo u kratkom roku odgovorilo i uputilo me da istu inicijativu podnesem prema Ministarstvu zdravstva, rada i socijalnog osiguranja. Znači pozitivnu listu lijekova koji se propisuju i izdaju na teret ZZO HNK proširiti sa listom imunosupresivnih lijekova. Obzirom da

sam prošli put čitala obrazloženje smatram da nema potrebe da isto obrazloženje čitam dva puta, znači isto obrazloženje koje je bilo i prošli put, samo sada inicijativa upućena prema Ministarstvu zdravstva, rada i socijalne zaštite.

Amir Šelo:

Pozdravljam sve uvažene kolegice i kolege, posebno pozdravljam danas ovdje prisutne predstavnike pravosudnih institucija, kao i mog uvaženog kolegu kantonalnog javnog pravobranioca. Isto tako drago mi je da danas ovu sjednicu uživo prenosi naš veoma uvijek prisutan medij Bljesak info, što je dobro da se sjednice skupštine kao najvišeg zakonodavnog tijela u HNK-a javno prenose, da građani ipak imaju uvida šta ovdje rade zastupnici koji su više nego dobro plaćeni za svoj posao. Ja danas ovdje imam jednu poslaničku inicijativu koju upućujem prema Vladi HNK-a i prema Ministarstvu poljoprivrede, vodoprivrede i šumarstva HNK-a. „Poštovani, pozivam Vladu HNK-a i Ministarstvo poljoprivrede, vodoprivrede i šumarstva HNK-a da pripreme informaciju o uticaju hidroenergetskih projekata „Gornji horizonti“ i „Donji horizonti“ na rijeke Bunu, Bunicu, Bregavu i Neretvu. Navedenu informaciju je potrebno dostaviti Skupštini HNK-a na osnovu koje će Skupština donijeti odgovarajuće zaključke prema drugim nivoima vlasti u BiH.

Isto tako ovo je nevezano sad za poslaničku inicijativu, samo bi vas molio budući predsjedavajući malo da skrenete zastupnicima da se drže člana 182 Poslovnika, da njihove inicijative i zastupnička pitanja budu ovdje koncipirane u tri minuta, a ne da mi kao zastupnici ovdje kršimo sami svoj poslovnik i da ovdje držimo časove historije, ipak svi imamo svoje vrijeme. Toliko od mene.

Donko Jović, ministar poljoprivrede, vodoprivrede i šumarstva HNK-a:

Inicijativa gospodina Šele, jako dobra inicijativa, ali nažalost nije u nadležnosti županije. Dakle, državni nivo, Federacija, mi smo tu bukvalno iznad naše ingerencije. Na tu temu se održalo bezbroj okruglih stolova i u BiH i u Hrvatskoj, sudjelovao sam na tim okruglim stolovima, ali to je sve u organizaciji državne razine i međudržavne razine, itd. Bilo je tu milijun nekakvih međusobnih tužbi između RS-a i Federacije, itd., ali jednostavno nismo mjerodavni da pripremimo takvu jednu informaciju. I plus što se radi o kategorijama voda prve kategorije, ima tu nešto i drugih, ali to je problematika državna, odnosno federalna. Nismo mi mjerodavni da jednu takvu cjelovitu informaciju prikupimo i damo. Evo toliko.

Amir Šelo:

Vidite, nemojte ovo, ja se izvinjavam evo što se još jedanput javljam, ali evo čisto kao dopuna, ovo neću shvatit kao odgovor na zastupničku inicijativu, ovo shvatam isto vama kao dopunu. Znači gore se nešto ministri i predsjedniče Vlade, gore se rade megalomanski projekti koji već sad imaju uticaj na hidroenergetske naše potencijale. Znači rijeka Buna, Bunica, Bregava, koliko ja znam to su rijeke za koje direktno nadležno ministarstvo. Rijeka Neretva je znači rijeka za koju je odgovorna Agencija za vodno područje. Ja ne vidim zašto mi ovdje kao najviše zakonodavno tijelo ne bi zauzeli određene zaključke. Ja ne tražim da vi radite ministre studiju direktnog utjecaja, ali možete pripremit nama zastupnicima čisto kraću informaciju šta se dosad dešavalo. Otiđite gore na Nevesinjsko i Dabarsko polje vidjet ćete da su vam ljudi skrenuli već sada ogromne količine naših rijeka i ja smatram da Skupština HNK-a ovdje mora djelovati po tom pitanju i moramo tražiti da naši viši nivoi vlasti ipak preuzmu određene korake po tom pitanju. Zašto Skupština HNK-a ne bi raspravljala o tome, ja ne vidim nikakvog razloga zašto ne bi.

Donko Jović, ministar poljoprivrede, vodoprivrede i šumarstva HNK-a:

Ovo je drugi put, ja neću više. Dobra ideja, da se ne vrtimo u krug, Skupština nek pokrene inicijativu, pitanje, šta god hoće, od federalne i državne razine. To trebaju prikupit podatke, ne može Federacija dobit podatke od RS-a, godinama traži, ne može ih dobit. Dakle, kompleksna priča, dobra ideja, ali neka Skupština pokrene inicijativu prema federalnom parlamentu ili državnom, nek oni odgovore. Hvala.

Nevenko Herceg, predsjednik Vlade HNK:

Kao zastupnik i kao evo predsjednik Vlade i kao čovjek koga se tiče ova struka. Trebali ste malo kolega Šelo bolje formulirati inicijativu i pitanje. Vi ste se prije svega referirali na utjecaj hidroenergetskih objekata projekta „Gornji horizonti“, koliko sam ja sad shvatio iz drugog vašeg istupa i istupa kolege Jovića. To je definitivno pitanje koje se tiče jako ove županije, ono nije u našoj nadležnosti, nije u nadležnosti Vlade i resornog ministarstva, ali ima jako veliki utjecaj na nas i snažno podržavam tu inicijativu. Nekako pomalo svi šutimo i šute, ono ima veliki prekogranični utjecaj, ima međuentitetski utjecaj i ono je pitanje međudržavno, državno i entitetsko, i međuentitetsko, ali se jako tiče naše županije, naše rijeke koje ste vi spomenuli Buna, Bunica, Bregava, Krupa i ostale ostaju bez vode, osobito u ljetnim mjesecima i dolazi nam slana voda sve pomalo dolje do Čapljine zbog smanjenog dotoka vode iz tog dijela, iz tog bazena. Vodu smo sliva rijeke Trebišnjice koja je sastavni dio sliva rijeke Neretve okrenuli prema Jadranskom moru, na dolje Plat, svi šute jer je taj utjecaj energetskog lobija prejak. Zato ja snažno podržavam vašu inicijativu, ali dajte malo usmjerimo je i formulirajmo je prema onim razinama, a naravno da se i ova razina vlasti uključi. Hvala lijepo.

Stana Burić:

Ovo samo uključujem se u ovo i podržavam gospodina Šelu onako bez zadržke i ja bih dala inicijativu da mi održimo jednu tematsku skupštinu na ovu temu jer je ovo ozbiljno pitanje. Premijer je rekao ono što sam ja htjela reći, Popovo polje ljeti ostaje bez vode, pretvara se u kanalizaciju, Trebišnjica koja treba ić u Neretvu ide u Plat i molim i tražim jednu tematsku sjednicu na ovu temu. Hvala.

Šerif Špago:

Zahvaljujem. Evo ja predlažem da svi ovi koji su govorili po ovom pitanju, da sjednu u narednom periodu i formuliraju neki prijedlog prema Skupštini koji će bit raspravljan ili ne znam ni ja, ali da ne ulazimo više sad u detalje oko ove rasprave. Znači po meni imamo i komisije, da one sjednu i da vidimo koji je najbolji način da dođemo do informacija i na osnovu tih informacija tražimo zaključcima od viših nivoa vlasti rješavanje određenih pitanja što su iz njihove nadležnosti. S ovim ja zaključujem raspravu po 1. tački dnevnog reda.

AD 2. Izvještaj o radu Tužilaštva HNK za 2019. godinu

Obrazloženje je dao Zdenko Kovač, glavni tužilac u kantonu HNK.

Otvorena je rasprava.

U raspravi su učestvovali: Aner Žuljević, Slađan Bevanda ministar MUP HNK, Alisa Hajdarović, Ivan Odak, Stana Burić, Zdenko Kovač, glavni tužilac u kantonu HNK i Šerif Špago.

AD 3. Izvještaj o radu Kantonalnog suda u Mostaru za 2019. godinu

Obrazloženje je dao Zoran Krtalić, v.d.predsjednik kantonalnog suda.

Otvorena je rasprava.

U raspravi su učestvovali: Stana Burić, Amir Šelo, Elvedin Grcić, Alisa Hajdarović, Nevenko Herceg predsjednik Vlade HNK, Šerif Špago, Zoran Krtalić, v.d.predsjednik kantonalnog suda.

Predsjedavajući Skupštine HNK Šerif Špago predložio je slijedeći zaključak:

„Obavezuje se Vlada HNK-a da obezbjedi neophodna sredstva za projekat energetske efikasnosti zgrade Kantonalnog suda u 2021“.

Obavljeno je glasanje.

Nakon glasanja konstatovano je da je predloženi zaključak jednoglasno usvojen.

Usljedila je pauza od 30 minuta.

AD 4. Izvještaj o izvršenju sankcija u HNK iz člana 1. Zakona o izvršenju sankcija u HNK za 2019. godinu

Obrazloženje je dao Suad Balić, ministar pravosuđa, uprave i lokalne samouprave HNK.

Otvorena je rasprava.

U raspravi nije nitko učestvovao.

Obavljeno je glasanje o Izvještaju o izvršenju sankcija u HNK iz člana 1. Zakona o izvršenju sankcija u HNK za 2019. godinu.

Nakon glasanja konstatovano je da je Izvještaj o izvršenju sankcija u HNK iz člana 1. Zakona o izvršenju sankcija u HNK za 2019. godinu jednoglasno usvojen.

AD 5. Informacija o usvajanju Akcionog plana aktivnosti potrebnih za izvršenje generalnih mjera naloženih Presudom Evropskog suda za ljudska prava u predmetu Balić i drugi protiv BiH, AP BR 44080/16 i ostalih presuda prema HNK i vremenski okvir za njihovu realizaciju

Obrazloženje je dao Adnan Faladžić, ministar finansija u Vladi HNK.

Otvorena je rasprava.

U raspravi su učestvovali: Nevenko Herceg, predsjednik Vlade HNK, Tomislav Martinović i Šerif Špago.

Predsjedavajući Skupštine HNK Šerif Špago u svom obrazloženju je naveo kako su svi poslanici prijedlog zaključka vezano za ovu Informaciju dobili u materijalima.

Obavljeno je glasanje po prijedlogu zaključka.

Većinom glasova „Za“, uz 1 glas „Protiv“, usvojen je zaključak vezano za akcioni plan aktivnosti potrebnih za izvršenje naloženih mjera presudom Evropskog suda za ljudska prava.

AD 6. Izvještaj o radu Javnog pravobranilaštva HNK za period od 1.1.2019. do 31.12.2019. godine

Obrazloženje je dao Vlado Bevanda, kantonalni javni pravobranilac.

Otvorena je rasprava.

U raspravi su učestvovali: Amir Šelo, Donko Jović, ministar poljoprivrede, šumarstvu Vladi HNK, Nevenko Herceg, predsjednik Vlade HNK, Vlado Bevanda, kantonalni javni pravobranilac i Šerif Špago.

Obavljeno je glasanje o Izvještaju o radu Javnog pravobranilaštva HNK za period od 1.1.2019. do 31.12.2019. godine.

Nakon glasanja konstatovano je da je Izvještaj o radu Javnog pravobranilaštva HNK za period od 1.1.2019. do 31.12.2019. godine jednoglasno usvojen.

AD 7. Izvještaj o realizaciji Zbirnog plana za 2019. godinu svih nosioci Programa razvoja male privrede HNK 2016.-2020.godina i Strategija razvoja malog i srednjeg poduzetništva u HNK 2012.-2020.godina

Obrazloženje je dao Željko Laketić, ministar privrede u Vladi HNK.

Otvorena je rasprava.

U raspravi su učestvovali: Slaven Raguž, Damir Džeba, Elvedin Grcić, Amir Šelo, Đuro Prkačin, Milica Pehar, Šerif Špago, Željko Laketić, ministar privrede u Vladi HNK i Nevenko Herceg predsjednik Vlade HNK.

Obavljeno je glasanje o Izvještaju o realizaciji Zbirnog plana za 2019. godinu svih nosioci Programa razvoja male privrede HNK 2016.-2020.godina i Strategija razvoja malog i srednjeg poduzetništva u HNK 2012.-2020.godina.

Većinom glasova „Za“, uz 1 glas „Protiv“, usvojen je Izvještaj o realizaciji Zbirnog plana za 2019. godinu svih nosioci Programa razvoja male privrede HNK 2016.-2020.godina i Strategija razvoja malog i srednjeg poduzetništva u HNK 2012.-2020.godina.

AD 8. Informacija o realizaciji potpisanih ugovora o koncesijama iz oblasti vodoprivrede zaključno sa 31.12.2019

Obrazloženje je dao Donko Jović, ministar poljoprivrede, šumarstva i vodoprivrede u Vladi HNK.

Otvorena je rasprava.

U raspravi su učestvovali: Amir Šelo, Tomislav Martinović, Ivan Odak, Stana Burić, Elvedin Grcić, Slaven Raguž, Nevenko Herceg predsjednik Vlade HNK, Šerif Špago i Donko Jović, ministar poljoprivrede, šumarstva i vodoprivrede u Vladi HNK.

Šerif Špago je predložio slijedeći zaključak:

„Prima se na znanje informacija o realizaciji potpisanih ugovora o koncesijama iz oblasti vodoprivrede, zaključno s 31.12.2019. godine“.

Obavljeno je glasanje po ovom prijedlogu zaključka.

Većinom glasova „Za“, uz 1 glas „Protiv“ usvojen je navedeni zaključak.

Šerif Špago pročitao je prijedlog zaključka zastupnika Amir Šele:

„Skupština HNK traži zabranu izdavanja koncesija za izgradnju novih mini hidrocentrala na rijekama u HNK-a“

Obavljeno je glasanje po ovom prijedlogu zaključka.

Većinom glasova „Protiv“, uz 7 glasova „Za“ i 1 „Suzdržan“ glas, predloženi zaključak zastupnika Amira Šele nije dobio potrebnu većinu.

Šerif Špago predložio je slijedeći zaključak: **„Zadužuje se Vlada HNK i nadležna ministarstva u Vladi HNK da u roku od 45 dana Skupštini HNK dostavi informaciju o**

realizaciji potpisanih ugovora o koncesijama zaključno sa 31.12.2019. godine iz nadležnosti svih ministarstava u Vladi. Zaključak stupa na snagu danom donošenja i objavit će se u Službenim novinama HNK“.

Obavljeno je glasanje po ovom prijedlogu zaključka.

Nakon glasanja konstatovano je da je predloženi zaključak jednoglasno usvojen.

Sjednica je završena u 17:00 sati.

Zapisničar
Dario Topić

Predsjedavajući
Šerif Špago